



**Siunnersuut uunga: Utoqqalinersiaqarnek pillugu Inatsisartut inatsisaat nr. xx, xx.xx-meersoq.** (Ilaqutariinnermut, Naligiissitaanermut Isumaginninnermullu Naalakkersuisoq)

Aappassaaneernerani Inuit Ataqatigiit oqaaseriumasaat.

Inuit Ataqatigiit soqutigisarilluinnarparput utoqqartatta, uagullumi utoqqaligutta pitsaasumik atugaqarnissarput. Kissaatigaarput utoqqartatta pitsaasumik atugaqarnissaat, aamma aningaasaqarnermikkut. Uagut utoqqalerusuppugut, maanna utoqqarniit atukkatigut ajornerusumik inissisimanata. Uagut utoqqalerusuppugut, nammineq utoqqalinissatsinnut katersisimalluta nunatta karsianut artukkiisuunngitsumik. Tamannalu pissutigalugu Inatsisissap uuma pitsaasuunissaa tamakkiisuunissaalu anguniarsimavarput.

Inuit Ataqatigiinniit utoqqaat ilisiartornermi akiliunneqartalernissaat ajorinngilarput tapersorsornartuutillugulu. Taamatuttaaq angerlarsimaffimmi ikiorteqarnerup akilertannginnissaa aamma isumaqatigaarput. Inuit Ataqatigiimmi soqutigisaraarput utoqqaat sapinngisamik sivisunerpaamik angerlarsimaffiminniittarnissaat. Soorlu aamma ilaasortatta Ane Hansen siunnersuutigigaa utoqqaat illuminni iluarsartuussiniartut taperneqartarnissaat akuerigipput.

Inuit Ataqatigiit aaqqissueqqinnermik suliassani pingaartitaraat aaqqissukat pineqartunut ataqatigiissarneqarnissaat. Utoqqalinissaq pillugu inatsisissaq, siusinaarluni suliunnaarnerisuteqarnermut inatsisissaq aammalu ineqarnermi tapisianut inatsisissat ataqatigiilluinnartariaqarput. Tamannalu isumannaarneqarsimangilaq.

Isumaqarpugut inuiaqatigiit periarfissinneqanngitsut apeqquaterpassuit utoqqalinersiaqarnermik aaqqissuusseqqinnermut tunngasut isummerfiginissaannut. Tamanna imaaliillaanaq akuerineqarsinnaangilaq.

Inatsisissatut siunnersuummummi Kattuffik Utoqqaat Nipaat tusarniaanermi akissuteqarsimangimmata, ataatsimiitsitaliami oqaloqatigineqarput. Inuit Ataqatigiit maluginiarparput oqariartuut ersarissoq Kattuffiup oqaatigisaa, tassalu utoqqalinersiaqarnek pillugu inatsisissap piffissaqarluarluni atuutilernissaa pingaaruteqartoq aammalu pineqartunik oqaloqateqarluarluni peqataatitsillunilu. Tamanna Inuit Ataqatigiit isumaqatigilluarparput. Isumaqaratta utoqqalinersiuteqalernissamut ukiut arlallit piareersarfiusartoq, aningaasatigut allatullu atugarisatigut iluarsartuussinissami. Taamaamat inatsisissap siusippallaartumik atuutilernissaa akerlaraarput, siunnersuuteqarnerpummi 2017-mi utoqqalinersiuteqartut 66 ukioqartarnissaat aatsaat 2019-mi atuutitikkusukkaluaratsigu. Taamattaq 2021-mi utoqqalinersiuteqartut 67 ukioqartarnissaat aatsaat 2023-mi atuutitikkusukkaluarlutigu. Tamannali partinit allanit isumaqatigineqanngilaq.

Inatsisissaq manna takorloorneqarpoq 1. januar 2016 atuutilissasoq, tamanna piviusorsiuunngilaq, soorlu siusinaarluni pensionisiaqartitsinermut inatsisiliornitta takutikkaa, inatsit pitsaasumik suliarineqassappat piffissaq oqaloqatigiilluarnerillu pisariaqartinneqaraluartut.

Unami siunnersuut aningaasanik 135 mio. kr. ukiuni qulini tulluuttuni sipaarfissatut tikkuarneqarpoq. Aaqqissuuseqqinneq una pineqartoq pipallatamik suliaavoq naammattumillu innuttaasunik peqataatitsinani naalakkersuisooqatigiinniit ingerlanneqarluni. Aningaasanik sipaarniarfiusinnaasut, akitsuuserneqarsinnaasullu nunatsinni amerlaqisut akornanni Utoqqalinersiat siullertut sipaarniarfigineqarnerat Inuit Ataqtigiit isumaqatiginngilaat. Inuiaqatigiinni aningaasarsiorluartut siullertut aallerfiginagit aamma inuit atugarissaartut tapiiffigineqarnerat millisarnagu, minnerunngitsumillu inuit pisariaqartitsinerpaat aaqqissuuseqqinnermut pilliuteqartitaanerat Inuit Ataqtigiit ilalersinnaanngilaat.

Utoqqalinersiaqartut kisimiittut qaffaavigineqanngillat, naak akit qaffakkiartornerannut aningaasallu naleerukkiartornerannut inuit kisimiittut isertitaat eqqorneqarnerpaajusartut uppersaatissaqartoq. Taamaalilluni utoqqalinersiaqartut ataatsimut isigalugit aningaasat pisartagaat ataatsimut isigalugit qaffariaatissaat annertooujussuurtut oqaatigineqarsinnaanatik.

Inuit Ataqtigiit ikinnerussuteqarluta oqaaseqaat aqutigalugu naqissuserparput aaqqissuuseqqinnerit naligiinnerulernissamik kinguneqartussat aallartisarneqanngitsut inuit pisariaqartitsinerpaat naalakkersuinikkut paaaffigineqarnerat isumaqatiginngilarput. Matumani pivavut akileraarternikkut, ineqarnikkut isumaginninnikkullu aqqissuuseqqinnerit. Aningaasarsiornikkut nukissaqarnerpaat peqataatinnaveersaarlugit aaqqissuussineq isumaqatiginngilarput. Naalakkersuisooqatigiit aaqqissuuseqqinnerat inuit nammaqatigiinnerulernissaannut ungasillisaataavoq.

Taama oqaaseqarluta inatsisissap aappassaaneernerani tamakkiisumik tapersiinnaannginnerput oqaatigiumavarput.